



UK, France aser Canada-i Hamas
bhukumer: PM Netanyahu

Caroline Garcia-i French Open 2025
tashi asayatsü



Dr. Neiphiu Rio-i NE nung textile maparen inyaktsü lemsatep

Dimapur, May 23, 2025 (TYO): New Delhi nung Rising Northeast Investors Summit 2025 alidang Chief Minister Dr. Neiphiu Rio-i tesentepertem dang Nagaland aser kidanger state tem nung textile maparen inyaktsü lenmang sadema aliba osang metetdaksü.

Northeast nung kin 200 tema aser oshi 192 tashi lir aser teka mapa ajanga aika sayur. Northeast nung rongsenketzüng tsütsü aluyimba sülen ajanga textiles ya lir ta Dr. Rio-i ashi.

"Northeast nung yarn, colour, aser handloom tajung adoktsü

atema meranger. Kin aser tetsür teloktemi sobaliba wazüka ayutsü, designs tajungba yanglutsü aser jenjang shitak latettsü meranger" ta Dr. Rio-i ashi.

Dr. Rio-isa company balala, bendangertem, aser private investor den ajurutepa sendentem menogo.

"Nagaland-i shishilembabaren zübazüba inyaktsü atema temelaba agütsür aser sempet aketer aika lir. Investors-i Nagaland nung arua maparen tenzüksüla aser iba ajanga külemi linük yangerba mapa inyaktettsü" ta paisa ashi.

Minister Kenye-i Duilumroi Small Hydro Power Project lapoktsüogo

Kohima, May 23, 2025 (TYO): Power Minister, K.G. Kenye-i Peren district kübok Poilwa village nung 2.4 MW Duilumroi Small Hydro Project (SHP) lapoktsüogo.

Iba mapatong ya run-of-the-river type hydroelectric facility lir aser iba ajanga Nagaland nung energy generation capacity tajungba nükjiding lir.

"Nagaland state ngur küm 60 tema süia aruaka 26 Megawatts power generation dang lir. Tanü asenok hydro project tulutem inyaktsü lenmang sadema mali saka Tsüngremi moatsü lima nung tesem tajung aika lir aser ali rongsen jenti moaja lir" ta Minister Kenye-i ashi.

Nagaland nung ayongnu aser ayong tila aika lir aser item nung mini hydro projects inyaktettsü koka lir ta paisa ashi.

"Nagaland ya power peria manguba state ka lir aser 193 MW peak nüngdakba nungi lean season mapang 95% aser monsoon nung 90% tashi tangalen nungi ang bener arua atsüker" ta Kenye-isa ashi.

"Asen nütsüng yongsük teimba akümer aser energy talila nüngdaker saka asenoki nüngdaba ama power peria menguteter. Anungji engineers aser policymakers-i Nagaland nung hydroelectric tesemtem jangjatsüla aser generation capacity teimba akümtsü atema lenmangtem bushiteptsü ayongzüker" ta paisa metetdaksü.

"Department of Power aser engineer temi mapang shitak nung iba mapatong renemba atema tenüngsang agütsür. Tesem nung mapa inyaktsü mesademaka nenoki kanga meranga inyakogo. Iba ya department ajunga nüma atangba mapang ka lir" ta Minister Kenye-i ashi.

"Senotsü peria meliaka state sorkari iba mapatong nung temulung agüja inyakogo" ta paisa shisem.

Duilumroi project ya Kohima nungi kilometer 45 shi pilar lir aser

Japfu Mountain range nungi aluba tzü nungi teyari agia yanglu.

Duilumroi Small Hydro Project (SHP) indang capacity ya 2.4 MW lir aser 60% Plant Load Factor nung küm nung 11.95 million units (MU) agütsütsü imlar. Iba ajanga Nagaland sorkari power alizükba nung Rs 6.5 crore shi kümzüksü ta asadangteta lir.

Iba plant nungi adokba power ji 33/11 kV sub-station ajanga grid den sendakteptsü aser Zubza adena Kohima nung aliba 132/33 kV sub-station dangi abentsü.

"India sorkari latetba Renewable Energy Purchase Obligation (RPO) den iba mapatong ya putepa lir aser Nagaland sorkari clean energy tenangzükb nung shilem agir" ta Additional Chief Engineer (Civil) Visakho Therie-i ashi.

"Iba mapatong ya department ali nung yanglu aser iba ajanga ali alizükba nung senotsü talila meindok. Iba mapatong nung Rs 40.29 crore endok aser unit generation cost ji unit ka nung Rs 5.51 atar. Iba jagi plant lapoker küm 7 nungi 8 tsüngda senotsü endokba ajunga meyipa angutsü imlar" ta Therie-i ashi.

Iba mapatong ya April 2021 nungi tenzüker aser EPC contract mode ajanga tongtipang mapatem Hyderabad nung amenoka aliba M/s Prakriti Technics Pvt Ltd nem lemmzüksü. Külen tanga mapa tilatem local contractors nem agütsü ta Additional Chief Engineer (Civil)-isa metetdaksü.

December 11, 2024 nungi trial operations tenzüka liasü aser tang tashi nung 367,800 units agütsüogo. Iba ajanga state sorkar senpong nungi Rs 20.2 lakh shi kümzükogo ta paisa ashi.

Iba sentong nung Power Department Secretary Asangla Imti, Chief Engineer (T&G) Kasho Chishi aser state finance & power department nungi tongti ketdangsürtem aden.

Aor Laishirtem Mokokchung yimtak Kümsem Inti Mungdang amunger



Mokokchung yimtak Ao Theological Association 33 Buba Kümsem Inti Mungdang nung "Tsüngremer Nükmet Laishir" ta asüba omen nung ajemdaker Rev. Dr. Limatula Longkumer-i tongti o jembir aser Clark Theological College puri ken atandang tangokba noksa.

Mokokchung, Monupii/May 23 (TYO): May 23 aonung Mokokchung yimtak Ao Theological Association 33 Buba Kümsem Inti Mungdang "Tsüngremer Nükmet Laishir" ta asüba omen nung ajemdaker Aotsür Aor laishir aika adenshia kanga dang takok ngua anogo asemnü sentong tenzükogo.

Arogo 128 nungi laishir aika adenba den, Theological institution nungi Principal, Professors aser student-tem, ABAM nung Executive Secretary-i anir ABAM nung telen balala nung tenzükertem aser onük jembirtem aser Arogo balala nungi Pastor-i anir toklang tenzükertem aika aden.

Taonung iba sentong nung Trinity Theological College-i Tekülem aser Tetushi agi aser Mokokchung Baptist Arogo ajanga kenten aser saya balala yia sentong akhümкета lapoktsü aser Asangma Baptist Arogo Pastor Rev.Tiameren ajanga lai zünga sarasademer sentong tenzüker.Asür bilemetetba mapang Rev. Mapula Lemtur ajanga agi, tarur pela agizükba o

Mokokchung Baptist Arogo Wb. N. Chubawati Deacon-i jembir, metepela mapang ATA Tatong Tir Rev. Sentimeren-i agi, tayongzükb o ATA Tir Rev. Jongpong-i agi,

Kümkümshidi ta asüba o NBCC General Secretary Rev. Dr. Mar Pongener-i jembir aser "Tsüngremer Nükmet Laishir" ta asüba onük nung ajemdaker Rev. Dr. Limatula Longkumer-i jembir aser iba den Samaro telok aser Clark Theological College puri ken ajanga Tsüngrem kuli asü aser tatem nung Longjemdang Baptist Arogo Pastor Wb. Along-i Tsüngrem tenüngsang agüja sarasademer sentong tembanga liasü.

NBCC General Secretary Rev. Dr. Mar Pongener-i kümkümshidi ta asüba nung jembidang "Aor rongnungi laishirtem rongnung tenüng züluoktsüsa maongka ngutetba asoshi Tsüngrem tenüng sanga retreta agizükdi, asenok dak kodanga rema maoba Tsüngremer sentsü ka nüloka lir, anungji iba sentsü ya mesenmetua mamshili arungma" ta ayongzüker.

Alima mopungsem balalai

onshidang asenok melaotsüsa asenok laishirtem kümküma alitsü tanü putui akanger, anungji Yisuji balaka lir ta angateta laishirtem tanela nung akanga lidi ta paisa ayongzüker.

Sentong nungsa Clark Theological Dean Prof. Dr. Imsütoshi ketdangsüba nung Rev. Dr. Limatula Longkumer taküm otsü kaket ABAM Executive Secretary Rev. Temsü Jamir-i meshiteta sarasademer sayaja liasü.

Tsüngremer Nükmet Laishir ta asüba onük nung ajemdaker Rev. Dr. Limatula Longkumer-i jembidang Tsüngremer tenük agi ajiokba, saklokba telokji laishirtem lir.

Laishirtemji Tsüngrem nem bendanga agütsüba laishir asütsüla, tanü Tsüngrem nem bendanga agütsüba laishir nüngdaker, tanabuba nung Theology rajema jangjaa azünger asütsüla nüngdaker, Theology azünga nung anenbaji masü saka laishirtemji angazükshia aliba laishir asütsüla. Tsüngremi mangdang akaba laishir nüngdaker, Tsüngremi tamang katetba laishir nüngdaker ta laishirtem ayongzüka jembia liasü.

Dimapur aser Chümoukedima nung lipoküm wazüka ayutsü asadang

Dimapur, May 23, 2025 (TYO): Committee on Environment & Climate Change of the Nagaland Legislative Assembly chairperson aser MLA Achumbemo Kikon-i anir Dimapur aser Chümoukedima district tem semdangogo.

Chairperson Achumbemo den külemi committee züngsemtem-Advisor Zhaleo Rio aser Advisor Z. Nyusietho Nyutho na den Urban Development aser Nagaland Legislative Assembly ketdangsürtemi Chathe River, Dhansiri River aser Dimapur o Chümoukedima nung Municipal dumping site reprangdanga senzü.

"Committee-i lipoküm dak sendakba tebilemtsütem atema inyaktsü. Iba nung residential

areas anasa sawmills aser stone crushers aliba, ayong menenba aser süngdonglidong tsüngdokba khuretem dena lir. Committee-i state sorkar dangi item khuretem koktettsü atema tebilembatem shidangtsü" ta Achumbemo-i ashi.

Committee on Environment & Climate Change of the Nagaland Legislative Assembly-i Dimapur, East Dimapur, aser Chümoukedima town council asem dang ayongtem mesüra kilentzü ayimdak jana meindoktsü ayongzükogo.

Parnokisa Dimapur aser Chümoukedima district administration tem dang parnok telongtet nung stone, gravel, boulder, aser sand excavation atema permit magütsütsü

metetdaksü.

Sorkari DMC dumping site nung waste recycling plant ka yanglutsü sentong lir aser iba asoshi public teyari nüngdaker ta Achumbemo-i ashi.

Osangbenertemi DMC dumping site belentsüba indang asüngdangdang "tesem tasen ka ngutetogo aser sentong junga yanglur ang mapa tenzüksü" ta pailangzü.

"Sorkari infrastructure tajungba kümdaktsütsü merangdang public teyari nüngdaker kechiyong lipoküm dak sendakba nükjidingtem atongtsüba ya nübor ajak külem tebilemtsü khuret lir aser amalitepa yariteptsüla" ta MLA Achumbemo-isa metetdaksü.

MP S. Süpongmeren Jamir-i Martoshi Memorial Mission Project semdang



MP Lok Sabha, S. Supongmeren Jamir-i May 23, 2025 nü Martoshi Memorial Mission Project, Longmisa semdangba mapang yimertemi pa nem aküm tetushi agüja senpettsüba mapang tangokba noksa nung angur.

Mokokchung, May 23, 2025

(TYO): Member of Parliament, Lok Sabha, Wb. S. Supongmeren Jamir-i 23rd May, 2025 nü Longmisa yim lushi kübok aliba Martoshi Memorial Mission Project (MMMP) semdanga Lishitzüyong tesem nung sentong ka agi.

Iba sentong nung tetushi tejaoker, Supongmeren-i jembidang, yim ka kübok yimden aser arogo na külemi lungjemer iba ama mapatong tajung achayangba ya jangratemtsüka lir aser iba ama mapa yabo pai mezüngbuba

angur, ta metetdaksü.

Mission mapaji rongsen aka nung dang inyakteter, aji oda, mission senbongi aittsüsa iba ama project tajung tenzüka yangi nungi aruba rongsen züsentedba jagi koda masür timtembapur yariba osang angashia kanga pelar, ta pai ashi. Paisa mission takok ngua aotsü atema meranga inyakba den ochi shia inyaksü ajungshi.

"Iba ya temoatsü aser nüngdakbapur yaritettsüba mission ka südakang", ta pai moatsü. Mission mapaji shirnoki ochishia inyakdir parnok

temoatsüba, anungji, atsiayonga masü mulungsoa aser jangrabangra tenzüksü paisa ayongzüka jembi.

Longsa o Longmisa ji akhi tsürabur mapang nungi tanü tashi lenla balala nung yaritepa aser putepa aruba ama tarutsü nunga yimnasanger tsüngta maneni kasa tangatetba nung putepa alitsü paisa asoshi paisa ayongzüka.

MMMP ya Longmisa yimtsüngi mezüng Khristar yimsü bener arusang Martoshi nüngtem tenzüka project ka lir. Iba ya 1986 küm 2nd March nung tenzüka, aser ibai tongtibangsa iba nungi züsentedba rongsen jagi koda masür kaketshir shirnok züngnür saka rongsen peria maka, parnok nem teyari agütsütsü nükjidong nung tentetba lir, ta MMMP mendenbuba Sashikümzüka-i metetdaksü.

Sentong nung Longmisa Village Council Chairman, Merensosang Jamir-i tayongzüka o tulu bener arua telok ayongzüka aser Imosanen Pongen-i melepzüng o lemsatep. Dr. Imnatoshi iba sentong nung menden liasü. Longmisa Pastor, Rev. T. Toshi den temoatsü meshia sarasademer tenzüka aser Longsa Pastor, Rev. Supongchiten den tenüngsang agüja sarasademer sentong tembang.

Directorate of Industries & Commerce ajanga application meshir

Dimapur, Monupii/May 23

(TYO): Department of Industries and Commerce-i National Award Portal ajanga takok tajung anguba MSMEs nungi 2024 küm asoshi National Award tejang 35 atema application meshir.

Awardees nem Cash Prizes den Trophy & Certificate agütsütsü aser iba Awards atema SLSC recommendation ya June 10, 2025 alitsü.

Iba dak sendakba osang tali tejangjaba nung metettsü asoshi website https://dashboard.msme.gov.in/na/Ent_NA_Admin/Ent_index.aspx nung angutsü.

Maneni tejangrar temi MSME-Development & Facilitation Office, M/o MSME, Govt, of India, 6th Mile Sovima, Chumoukedima, Nagaland-797115. Phone: 03862-248552,

Email: brdcdi-dima@dcmsme.gov.in, Website: www.dcdi-dimapur.gov.in aser Directorate of Industries & Commerce, Govt, of Nagaland, Kohima-797001. Mobile: 8415858055, Email: industry.naga@gmail.com, Website: www.industry.nagaland.gov.in den tongteprateptsü akok, ta sangdong ka ajanga ashi.

Sechü Zubza nung opium seret 14.312 apu

Dimapur, Monupii/May 23

(TYO): 78 Bn CRPF nungi sepaitem aser PS Sechü Zubza nungi police temi May 23, 2025 nü NH 29, Peducha Old Police Check Gate nung gari tem soita mita aoba mapang Senapati nungi Dimapur leni oyaa aliba Tata Winger (registration No. MN-06B-1350) ka nung opium seret 14.312 nguteta liasü.

Iba temesepba mozü kibur Dharam Sing resident of

Ludhiana, Punjab ya Senapati, Manipur nungi iba Tata Winger nung mener adok. Gari ya soita yangi mena alirtem dang parnoki bena aliba khu lapokdaksü.

Iba mapang Dharam Sing yagi metzü meshitsü asüngdang aser pa lenmang tezüleni ao. Mapang tatsüka lir pa tenemleni asema ao, anungji jawans temi par arishia oa apu.

Iba sülen pa anir arua pa

indang Safari trolley aser bag ka lapoktsü ashi. Iba mapang polythene agi aleper aliba opium talep ana, Khaini dabbas ana sünga opium aser ano polythene tanak ka nung opium sepa aliba den sen 56,500 ngutet.

Opium ya yangjisa Magistrate, Sechü Zubza lia seret odang aser seret 14.312 liasü. Dharam Singh den pa ket nungi ngutetba temesepba mozü ya PS Zubza nem agütsüogo.

NSCN/GPRN ajanga asükhu lemsatep

Dimapur, Monupii/May 23

(TYO): Yimrup yimtsüng nungi Noche Chang asüba atema par jabaso Peter Chang aser kinunger den asükhu lemsateper, ta NSCN/GPRN sangdong ka ajanga ashi.

Asür Noche Chang ya

Chang Region kübok Leacy jenjang nung kanga jeret-pereta linük tenzüka liasü aser May 18, 2025 nü iba lima nungi pila.

Pa takum alidang Naga lima asoshi bendanga agütsür tenzüka atema NSCN/

GPRN-i asür nem akhum agütsür. Pei agütsü mebilemi linük asoshi pai shilem tajung agiba Naga nunger puti otsü nung teti alitsü. Asür tanüla teti tatem maka tesunep nung anisüngzükjangma, ta NSCN/GPRN sangdong ajangasa ashi.

Menungraa Bilemtetba O

ASO 1930 - ASÜ 24/5/22

Asür tsürabur Kilemsüngla (Changdang)



Tsürabur tajung na onok nungi pilaa orr joko tanü agi küm agi asem (3) renteter, na onok den meliaka-sa nü sempet aser ajemalu shisatsü teti onok molungjangi arur aser menungra-a bilemteter.

Iba akümüli nung asenok meimchir shia ainer ka-ka dang lir, soli-süli lima alir asü nung künü anogobo meimchir ajak asüym bushidang pelaseta na aliba kotak lima angutsü menungraseta iba molungnen O lemsateper.

Temeim Kinungbo, Chirnurtem aser Sosemtangsem.



NATIONAL COUNCIL OF EDUCATIONAL RESEARCH AND TRAINING (NCERT), NEW DELHI

Admission to Various Teacher Education Programmes of Regional Institutes of Education

Advt. No: 513

Dated: 15.05.2025

The National Council of Educational Research and Training (NCERT), New Delhi is an autonomous organization set up in 1961 by the Government of India, Ministry of Education to assist and advise the Central and State Governments on policies and programmes for qualitative improvement in school education and teacher education. The nine constituent units of NCERT located in different parts of the country, include: (i) RIE, Ajmer, (ii) RIE, Bhopal, (iii) RIE, Bhubaneswar, (iv) RIE, Mysuru, (v) NERIE, Shillong, (vi) RIE, Nellore, (vii) NIE, New Delhi, (viii) CIET, New Delhi and (ix) PSSCIVE, Bhopal.

Applications are invited on-line from the eligible candidates for admission into various Teacher Education Programmes, viz., (i) B.A.B.Ed. (4 Year) (ii) B.Sc.B.Ed. (4 Year) (iii) M.Sc.Ed. (6 Year), (iv) B.Ed. (2 Year), (v) B.Ed.-M.Ed. (3 Year), (vi) M.A. (Education Technology)(2 Year) (vii) M.Ed. (2-year) run under Regional Institutes of Education. The on-line application form link will be available shortly in the Institute's website <https://www.riebbs.ac.in/>. The important dates will also be notified in the same website in due course of time. Candidates interested are advised to be in touch with the Institute's website and leading newspapers for further updates.

Date of CEE-2025

29/06/2025*

**Subject to change by notification in CEE Portal.*

Principal RIE, Bhubaneswar

Shamator District Contractors' & Suppliers' Union tentetogo

Dimapur, Monupii/May 23

(TYO): Nagaland Contractor's & Supplier's Union (NCSU) kübok Shamator District Contractors' & Suppliers' Union (SDCSU) tanü, May 23, 2025, NCSU tir Pele Khezhie-i tenzüksüogo, kong NCSU Head Office Kohima, Yimkhiung Tribal Council aser District Administration nungi ketdangsürtem dena liasü.

Sentong akhumdong Pele Khezhie-i iba sentong nung jembidang, local contractors ajanga district tasenba, Shamator nung sorkar indang terenlok maparen anepalua inyaksü nükjidong nung SDCSU amenoker, ta ashi.

Pai SDCSU züngsemtem dang Shamator nung terenlok maparen yakyaka inyaksü ayongzüka liasü aser kati ka den teka amteper district administration den shisa obang ka sür züngsem ajunga nem maongka kasa agütsütsü ayongzüka liasü.

Khezhie-i parnok dang table tenders nung tenük yoktsü ajungshi, koba ajanga sorkar totuyuba nung aibelener, kong contracts aser supplies mapa ajunga open tender ajanga inyaksü shia lir.

NCSU tiri District Administration aser YTC lenirtem adenba asoshi pelaba lemsateper aser parnok teyari ajanga NCSU unit tasenba aser yangi züngsemtem tashi itshitsü imlar ta shia liasü.

Sentong nung Deputy Commissioner Chubatemjen aser YTC tir S. Throngso Yimkhiung nungeria ketdangsür aser SDCSU züngsemtem dang district nung lenla ajaklen terenlok asoshi mapa tajungba nung inyaksü ajungshia liasü.

Iba sentong nung SDCSU tatong tir Ariba menden liasü, Pastor Shamator Town Baptist Church Rev Thsankiu-i sentong tenzüka sarasademer aser SDCSU tir Kiumuhean-i pela agizükba o jembia liasü.



May 23, 2025 nü New Delhi nung Rising Northeast Investors Summit 2025 nung Ato kilonser Narendra Modi, Development of North Eastern Region (DoNER) Union Minister Jyotiraditya Scindia, Assam Chief Minister Himanta Biswa Sarma aser tangartem adenba noksa nung angur.

India-i FATF dang 'Grey List' nung Pakistan züngoktsü mepishir

New Delhi, Monupii/May 23 (Agencies): Pakistan aser India na tsünga tesendaktep kanga mejungi lia India-i Financial Action Task Force (FATF) dang parnok indang 'grey list' nung Pakistan tanaben züngoktsü atema mepishitsü.

Pakistan-i kiralongrar den tesendaktep ayuba atema temelung melemi 2018 küm June ita nung Pakistan ya FATF indang 'grey list' nung züngoka liasü, ajisiüaka Pakistan sorkari kiralongra funding nokdangtsü atema inyaksü, ta sangdongba sülen 2022 küm October ita nung 'grey list' nungjagi Pakistan agiena liasü.

FATF indang 'grey list' nung tang linük 25 züngoka lir aser item linüktem nung

kiralongrartem inyaksangshi Brihostibarnü Rajasthan mita repranger. India-isa World Bank danga Pakistan nem senotsü tagütsü ta mepishitsü.

Tamalen India-i International Monetary Fund (IMF) dang Pakistan nem dollar sen billion 1 ji magütsütsüla, kechiyong Pakistan-i senji kiralongra atema amshitsü, ta metetdakja liasü.

Tawa India aser Pakistan na tsünga raraba mapang nung IMF-i Pakistan-i meshiba ama dollar sen billion 1 agütsütsü lemteta liasü.

IMF-i, September ita nung extended fund facility (EFF) ji asadanga liasü, aser iba nungji ajemdaker Pakistan nem senotsü teyari agütsütsü atema May 9 nü Board-i telemtetba agi, ta metetdakja liasü.

senden ka nung jembidang Ato kilonser Narendra Modi-i, "Kü tezü nung azü masü saka 'sindoor' tatsük ayimer," ta jembia liasü.

Modi-i, kiralongrartemi tamangba yimsü asüngdangba sülen Hindu tsürtem tenütsü nungi 'sindoor' agienja liasü, ibayongji India nunger ajaki kiralongrartem nem temerenshi agütsütsü melungtet, ta metetdaksü.

"Iba tenangzüka nungji ajemdaker asen sepaitemi inyak," ta pai ashi.

Modi-isa, Operation Sindoor kübok India nunger airstrikes ajanga Pakistan nung Rahim Yar Khan airbase bo tang ICU nung lir, ta ashi.

Delhi nung Bangladesh nunger 121 den parnok yarir India nunger 5 apu

New Delhi, Monupii/May 23 (Agencies): India nung Bangladesh nunger 121 den parnok yarir India nunger pongu Delhi Police-i puogo.

Parnok Bangladesh-i meyipä yoktsü atema Foreigners Registration Office (FRRO) ajanga inyaksangshidar, ta metetdaksü.

Tesüiba hopta ka tsünga Bangladesh nunger 121 apu aser iba dak sendakba nung India nung nung pongu dang asüngdangyadar.

Deputy Commissioner of Police (outer north), Nidhin Valsan-i, "Ozüng alema bendangertem anir arua linük nung nung jenokdakja

inyakba atema Narela Industrial Area police station nung ken o ka benokogo," ta metetdaksü.

Special Investigation Team (SIT) kati iba ken o bushisüngdangdar. Mezüng bushisüngdangba ajanga, documents shidak malirtem jenokdaksüba nung India nung pongui shilem agia aliba putetogo, ta police-i metetdaksü.

DCP-i, "Tim departments nem tetuyuba kar agütsüogo. Aadhaar aser voter cards densema taila documents yangluba nung sorkar mapa inyakertem densema kari danga shilem agia aliba putetra temerenshi agütsütsü," ta metetdaksü.



बैंक ऑफ़ बड़ोदा

Bank of Baroda

PUBLIC DANG SANGDONGER



Bank of Baroda, Dimapur Branch-i Lt. Tokhuvi Awomi'er jabaso Shri. Hutokhu Awomi tenüng nung tsünglanglen shia aliba kiojenji customers kati mepishiba ama loan/credit facility atema security ama agizütsü tebilemba lir, ta public dang sangdonger.

Tsünglanglen shia aliba kiojenji atema kar temeden lira/kar meyong süra, parnok dang anogo 10 tsünga kuli bener arung ta mepishir. Anogo 10 tashi nung telangzüba kecha melira, iba kiojenji meyonger shinga mali ta züngshitsü aser Bank-i 'mortgage' maparen tenzütsü.

Kioien osang teiangja:

Eralibil (Ekaraniopathar Village), Dimapur nung Garo Baptist Church anasa Mouza No. 03, H/No 211 kübok Patta No.225, Dag No. 189 nung ali tasazük 04B-03K-12Ls kimong.


Bounded by : North : Hukheshe & Dr. Yetovi
East : Rev. Dr. Shiwoto
South : Approach Road
West : Kikuto



(K. H. Zhimo)
Chief Manager
Advocate
Mob: 8119922922
22.05.2025



Bank of Baroda, Dimapur



(Haihangrang E. H. Newme)
Empanelled
Mob: 9402237781

Dimapur Branch : Nyamo Lotha Road (Church Road)
Dimapur - 797112 Nagaland
Email : dimau@bankofbaroda.com

GOVERNMENT OF NAGALAND

DIRECTORATE OF EMPLOYMENT, SKILL DEVELOPMENT & ENTREPRENEURSHIP

NAGALAND: KOHIMA

NO.DET-2/14/2001/PT-III/

Dated Kohima, the May 2025

ADVERTISEMENT

Application in the prescribed form is hereby invited from bonafide local candidates for undergoing training at various Govt. Industrial Training Institutes under Craftsmen Training Scheme for the session 2025-2026/27.

Name of the Institutes, sanctioned trades, duration of courses and minimum Educational qualification required are given below:

SESSION : 2025 - 2026/27

Sl.No	Trades	Duration of Course	Minimum Educational Qualification	Seating Capacity	Name of Govt. ITIs	
A. Engineering Trades					*NCVET	**SCVET
1.	Wood Work Technician	1 year	8 th Passed	24 each	Kohima, Mon. Phek, Wokha, Tuensang, Kiphire	Kohima
2.	Plumber	1 year	8 th Passed	20 each	Kohima	Phek, Zunheboto.
3.	Welder	1 year	8 th Passed	20 each	Kohima.	-
4.	Mason (Building Constructor)	1 year	8 th Passed	24 each	Kohima.	
5.	Mechanic Diesel	1 year	10 th Passed with Math & Science	24 each	Kohima.	Tuensang
6.	Electrician	2 years	10 th Passed with Math & Science	20 each	Kohima	Mon
7.	Fitter	2 years	10 th Passed with Math & Science	20 each	Kohima	-
8.	Draughtsman(Civil)	2 years	10 th Passed with Math & Science	24 each	Mokokchung	-
9.	Mechanic Motor Vehicle	2 years	10 th Passed with Math & Science	24 each	-	Mokokchung, Mon, Phek
B. Non- Engineering Trades.					*NCVET	*SCVET
1.	Cosmetology	1 year	10 th Passed	24 each	Kohima	, Phek, Chümoukedima.
2.	Computer Operator & Programming Assistant(COPA)	1 year	10 th Passed	24 each	Kohima, Mokokchung, Zunheboto, Mon,	Kohima, Wokha.Chümoukedima.
3.	Knitting	1 year	8 th Passed	20 each	-	Kohima, Mon.
4.	Sewing Technology	1 year	8 th Passed	20 each	Kohima, Mon, Chümoukedima. Kiphire.	Kohima, Tuensang, Wokha, Phek Zunheboto.
5.	Stenographer Secretarial Assistant	1 year	10 th Passed	20 each	-	Chümoukedima, Mokokchung.

* NCVET - National Council for Vocational Education and Training (Under Central Govt.)

** SCVET - State Council for Vocational Education and Training (Under State Govt.)

N.B:

1. Candidates applying for admission must be above 14(fourteen) years of age as on 1st August, 2025 and there is no upper age limit.

2. Application form will be issued from respective Govt. ITI on any working day during office hours w.e.f 09/06/2025 (Monday).

3. Seating capacity for trades under SCVET is 20 nos each.

4. Cost of Application Form is Rs. 100/- (Rupees Hundred) only.

5. Last date of submission of form is 04/07/2025 (Friday).

6. Date of Entrance test :

a).	17/07/2025	Non Engg. Trades	Morning -10:00 am (under Matric Trades) Afternoon-12:00 pm (Matriculate Trades)
b).	18/07/2025	Engg. Trades	Morning-10:00 am (under Matric Trades) Afternoon-12:00 pm (Matriculate Trades)

7. Entrance Test result will be declared on 30/07/2025(Wednesday).

8. Only women candidates need apply for Women ITI, Chümoukedima.

9. Selected candidates will be paid stipend @ Rs.500/- PM.

10.4% of the seats will be reserved for Person with Disability (PWD) for admission to ITIs.

11. Combined selection of candidates shall be done on the basis of merit in the written test to be conducted in each ITI as indicated above.

12.If the number of applicants fall below 10 (ten) in a Trade in a specific ITI, no admission shall be taken up. The candidates of such trades shall be admitted to other ITIs in the same trade, subject to availability of seats.

Sd/-
SAVIO VISA, Director

GOVERNMENT OF NAGALAND

DIRECTORATE OF TECHNICAL EDUCATION

NAGALAND: KOHIMA

Dated:Kohima, the th May 2025

NOTIFICATION

NO.DTE/SCTE/6/2023-24: This is to notify that in view of some Diploma seats lying vacant under the State-run Polytechnics during the current session 2025-26, the interested candidates are hereby invited to come to the office of the Directorate of Technical Education, Nagaland, Kohima for spot admission.

The admission against these seats will be based on " First Come First Serve"

(ER. VIPULHOU LHOUNGU)
Director

GOVERNMENT OF NAGALAND

DIRECTORATE OF PRISONS

NAGALAND: KOHIMA

NO.PRI/HQ/ESTT-559/22

Dated Kohima, the 24nd May 2025.

ADDENDUM

In continuation of this Office Advertisement NO. PRI/HQ/ESTT-559/22 Dated Kohima, the 22nd May 2025, Applicants are requested to adhere to the updated APPLICATION FORM in the Department's website <https://prisons.nagaland.gov.in..> Documents to be enclosed at Sl. No. 3. regarding Scheduled Tribe Certificate and Indigenous Inhabitant Certificate should be as per the latest existing Government Notification NO.AR.16/7/94 Dated the 2nd February 2016.

Sd/-
(RENCHAMO P. KIKON) IPS
Director General of Prisons
Nagaland, Kohima.



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 24, 2025

Tekümdang senso

Tanü putu nung senso shia asoshi tekümdangtsü kaji mapa ajak nung tiyazü inyaka angur aser taolen ajak nung tiyazü ajurur, ano jembiba ajak tiyazü agi mimbanga yur jembir ta angateter, anungji senso shia atema kanga tongtimbang mapa kaji, mapa ajak nung aser taolen ajak nung aser ano tangashiba ajunga nung tiyazü o ochi na bendangtetsüla. Ibaji mapa temelabo masü saka senso shiai peisasa ochishia alitsü mulungtera, tiyazü o ochi na bendangtsübaji melamelar asütsü. Atangji, ochishia alitsüba ya tasak, kechiyong ochishia lira yakta takar makümtsü, tangar yakta memeneptsü aser taküm nung taginütsü melamelaa magitetsü. Aji oda, tiyazü jembia ochimashi mapa inyaksüba ya taginüba ka atongtsü atema lenmang tatsüba, short cut, bushia aoba amai lir. Ajisüaka, ochishia inyakba lenmang nungbo 'short cut' mali, lenmang piyong indang-indanga aotsüla. Aji oda, tiyazü jembia takok anguba mapaji shitakba temoatsü aketba mapa masü saka tiyazü asütsü. Kasaji, tiyazü jembia anguba rongsenjia shitakba senmang kuma aotsüba rongsen masü saka tiyazü rongsen asütsü. Aji oda, tiyazü takok aser tiyazü rongsenji aonung pongmang nung anguba takok aser rongsen amai asütsü, anungji rüjep agi tzü kuma yimsaa ao ama aotsü. Ajisüaka, alima nung tashi akar nisungtemi aji mangateter, iba jagi pei ket nung tashi alidang tajung aser shitak inyaksü merangtsü melen, tanü asen lima yabo akok tashi tiyazü agi takok angutsü merangtepba aser tiyazü ajanga takar akümtsü merangtepba lima ka kumadokogo. Iba ama lima ka nung nübortem kumkuma melira, pei kidang akaba dena tiyazü jembir tashikartem nemji sür odaktsütsü. Tanübo asenok tia ajung, talisa, asenokbo ajaki züluteter aser züngteter, anungji alima nung kechi ataloker aser yimten nunga asen temeten kechi ali, aji züngeteter aser züluteter. Shisaliok (Education)-i agütsüba tashi ((power)-ji aji lir. Ajisüaka, iba tashiji asenoki mamshiba ajanga tashikartem asenok ya kecha memetetba sowar nisung amai bilemer aser aji shitak lir, kechiyong asen angutsüba temeten aser teyari kecha magütsü aseni ngua bener oadokyonga asenoki ola madoker. Iba jagi tamasabo asen angutsüba shilem nungi 5 % dang tiyazürtem jagi agizük, idangji asenoki ola madok, anungji iba sülenjibo 20 % agizük, idangjia ola madok, anungji ano 50 agizük saka idangjia ola madok, anungji tangbo asenoki 100% agizüka tiyazüsanger ki tonga atentena bener otsür. Iba ama asenoki ajangshiba tensa tia nung tamajungtibaji, asenoki asen meyong 100% tiyazüsang nem par meyong ama bilema bener otsüba asütsü. Aji oda, asenok dak wainshin mali, asenok meküm kum nungji khi khen tiyazü rogotem jagi asen dang meima asen meyong sen 40 % amshia mapa inyaksür, anungji asenok iba jagi tepela marem benjong lia tiyazüsang nemji tetushi tulu agüja iba mapaji semzükdaksür. Iba benjong ayongertemji tangar masü asenok lir. Iba amaji ali nung, kodaser tangari tiyazü agi asenok memesüshitsü ? Asenokji temesüshinütsüka lir ! Aji oda, asenok asoshi yangluba mapatembo mashimashi yanglutsüyonga kecha masü; asenokbo tilakati tenük tasüng, janarüja mashi kati asüyonga tebok süngra ojang ! Iba amaji lia lia asenok ajak tiyazür kumogo, kechiyong tiyazü mejembira mapa meinyakbo taküm melitetsü. Iba ama tiyazü lima aser tiyazü taküm nungi asenok shitakba asangsang ochiba lima aser taküm dangi arutsüla aser asenoka asen temeten aser teinyaksü mapatembo meteta alitsüla. Iba ama tiyazü agi asenok alar kumdakja mesüshidang asenok pezüpezüa melii asenok ajak ya tekümdang senso kaka asenoksasa asenoki kumtetsüla. Atangji, asenok rongnung senso ka anatibo yimkong asoshi nungsen agia tiyazü mapatem anema nokdakba angur saka asenoki parnok pu kuma menokdaker. Aji oda, tiyazü mapatem indang osangkakettem nung adoker saka asenoki koka masür. Asenokbo kidang dang atatsüla aser tangari dang asenok asoshi nungsen aser timtema agitsüla aser asen dangibo terenem dang bener arutsüla ta asüba tiyazü lima nung alir sensosangertemji asenok lir. Atangji, asenokia tiyazür anema masü saka tiyazü anemajibo ola adoktetsüla, ajimesüra asenok alima nung khi aliba yaa tiyazü nung alir asütsü.

OLEMSABANG

Yimra agi atongdang anepalutsü yim

Source : The Week Health



Aikati temang metaa shirangbaji tashidaka ta bilemer, saka ibaji tashidak masü saka temang shilem ka nung timtem aliba ajanga temangji metaa shiranger. Atangji, temang shilem ka nung tashidak tuluka aliba ajanga temang tera metaa shirangtsü akok aser ano kenkenbo temang shilem ka nung timtem tilaka aliba ajanga temang kanga metaa shirangtsü akok, anungji temang metaa shirangbaji kechi agi shiranger, aji putettsüba kanga tongtimbang lir.

Tain ka kodang temang metaa shirangdir, temetetsü kaji, pa mesüra la temang tatsük akümbaji 103 degree Fahrenheit (39.4 degree C) alema tura, ibajibo lendong ta metettsüla. Ano, tanur tilabo temang metaa shirangbaji temang nung timtem tulu alitsüa akok, anungji yakta tanur doctor bushitsüla.

Iba ama shirangba mapang tzü kangja ajemtsüla, saka süngjang tzü mesüra saisapong dang ajemba tajemtsütem kangabo majemtsüla. Anisüngzüksüla aser teti süoshi aser yimten sü melentsüla, Süoshi aser yimten sü talirabo magitsüla aser mapentsüla. Tzü temekong agi mechigotsüla. Chigonüra tzü talem agi mesüra sponge nung tzü metener temangji aishitsüla. Ayipba takdang nung mopong peria aittsüla aser teti teka shidoktsüla, saka tzü kangabo mamshitsüla. Teka agi teni, tenük aser tebang nung mekongshitsüla aser hachi dang sü agi tebang aser teni nembanger tangar malilen hachitsüla.

Temang metabaji anogo asem tashi nung mesüngzükra aser temang temperatureji 40 degree C dang tema tura doctor bushitsüla. Ano, peisasa mesoitetsüsa temang atentenra aser mangmanga tekolak ngora, idangjia doctor bushitsüla.

Tanurbo anogo ka dak tali temang metabaji mejungra lendong, anungji doctor bushitsüla.

Ano, saktsüba, tebok ashiba, tzü junga maoba, tango junga mesashitetba aser tebang mechi, temeli aser temezüng sentsü nenyanyena kumadokra, doctor bushitsüla.

Saktsü-pokshi (vomit & loose motion) :

Asenok aikati saktsü-pokshi agi atongdang chi tasa aontzü melii chiyonger aser tzü majemer. Ajisüaka, iba ama anepaluba yimyaji kanga tai aser yamajisa anepalura nisungji yakta süa adoktsü. Iba amaji shirangdang takok tashi tzü ajemtsüla. Tanü asüngbo mozü ayokdak ORS (Oral rehydration solution) tajemtsü yanglur angur, anungji aji alia ajemtsüla . Mesüra ORS talep ka tzü litre ka nung meyokteper meneni ajemtsüla. ORS melira kidang asenoki aon nung enokba metsü (common salt) ya jamos (tea spoon) tila tesadang ka den chini (sugar) teka sünga ka tzü litre ka nung meyokteper jemdaktsütsüla aser tekaratiba nung doctor atongtsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

African Arogoi Tsüngremi melungba inyaktsüla: Dr. Goodwill Shana



Kenya yimtiba, Nairobi nung Association of Evangelicals in Africa (AEA) Tir, Dr. Goodwill Shana-i AEA 13buba mungdang nung jembidang tangokba noksa nung angur.

May 23, 2025: Kenya yimtiba, Nairobi nung Association of Evangelicals in Africa (AEA) 13buba mungdang nung okila jembidang Dr. Goodwill Shana-i, Tsüngremi aginüba ama Africa yangertsü atema African Arogoi Tsüngremi melungba inyaktsüla, ta ashi.

Association of Evangelicals in Africa Tir, Shana-isa, African Arogoi continent tarutsü tia atema khuret bena inyaktsüla, ta ashi.

Küm asem nung khi ayongzüka amongba AEA General Assembly ya Nairobi nung May 21 nungi tenzüka May 23 tashi agiogo. Iba mungdang nung Africa tesem balala nungi evangelical lenirtem jenti adenshia Africa nung tayongzüka balala aser maangka balala atema o lemtepa liasü.

Dr. Shana-isa, Arogo nung züngsem renlokba kija nung merangloksü saka Tsüngremer yimli den medemdanga loktiliba nung temelenshi adokdaksütsüsa inyaktsüla, ta ayongzü.

"Arogotem kanga ainer saka lokti tentettem tejakleni maoer. Asenok ket nung ali rongsen jenti lir, ajisüaka asen nüburtet sensak tia nung liteper. Alima nung Khristan nütüsing teimba alibaji Africa lir, ajisüaka temelenshi tera dang lir," ta pai metetdaksü.

Africa nung Arogo kanga kera ainer, ajisüaka taküm libaliru, rongsenkettzüng aser yimtenren jenjang majungba dak sendakba nung pai Arogotem dang meyipa reprangshitsü ajungshi.

Africa kübok Zimbabwe, Nigeria, Democratic Republic of Congo aser Kenya linüktem nung tensa majungba atishia Shana-i, Khristan nütüsing arenyonga loktiliba nung temelenshi mali, ta metetdaksü.

"Khristan nütüsing teimba aliba linüktem nung tang tashi ochimashi, sensak tia aser rara lir, iba denji külemi yimtenren tashimait," ta pai metetdaksü.

"Africa nung ali rongsen moatsüba ama tanga tanga continent mali. Ajisüaka iba

temoatsü ajanga rongsenkettzüng, yimtenren aser technology tsütsü temelenshi bener marutsüteter. Alima nung Khristan nütüsing teimba aliba continent ji asenok lir, saka inyakyim majungba agi tang tashi asenok timtemer," ta pai metetdaksü.

"Iba timtem bentettsü atema tanela tsütsülen nungi dang masü saka atangji kulitem bushia inyaktsüla aser Arogo atema kulisürtem asütsüla," ta pai ashi.

African Union indang vision document, "Agenda 2063: The Africa We Want," dak sendakba nung Shana-i, AEA-ia theological tsütsülen nungi "Tsüngremi aginüba Africa ji kechi?" ta shisadanger, ta metetdaksü.

"Tsüngremi aginüba Africa yangertsü atema Tsüngremi aginüba ama Arogo nüngdaker," ta paisa metetdaksü.

Dr Shana-i, "Arogoi yimtenren tashi den tesendaktep yanglura ochimashi akümer aser Arogo dak metsü samaadoker. Ajisüaka Arogoi ainkartem mangdang nung rangloker ochiba, temeshiba aser ajemalu nung loktiliba den atongsema inyaktsüla. Kechi tai, ibaji aitsüba masü saka kechi shidak ibaji sangdongtsüla," ta ashi.

"Ainkartem ola angaa inyakba dak sendakba nung mezüngbubaji Tsüngremer ochi sangdongtsüla," ta pai ashi.

"Tanabubaji Tsüngremer ola angaa tarutsü nung tataloktsü shin otem lemsatepba lir. Ajisüaka iba ya Africa nungbo taaktsüka kümogo, kechiyong 'celebrity' ainkartem aika adoka pei nija tajangzüik angutsü atema parnok sülen anidakertem anisar," ta pai ashi.

"Tasembubaji Arogoi longjemmer ochi, ajak kasa züngshiba, temenen nangzüka aser loktiliba nung temelenshi atema inyaktsüla," ta pai ashi.

Shana-i Arogo nung lenirtem dang Arogo ya tashi aliba mesüra azükaruba reju ka ama mebilemtsüla saka Khrista mesükba nung nüburtet tenzüka Arogo ka asütsüla, ta ayongzü.

Lanurtem dak sendakba nung pai, "Tan putu lanurtem ya asenok aliba putu nung alirtem masü. Parnok media aser digital lima nung alir, anungji asenoka iba lima nungji alitsüla, yamaji mesüra asenoki parnok anir marutettsü," ta ashi.

Association of Evangelicals in Africa (AEA) ya 1966 küm tenzüka liasü aser iba tentet nung national evangelical fellowship 40 densema lir. AEA headquarters Nairobi nung lir aser AEA ya World Evangelical Alliance nung regional affiliate ka lir.

ANOGO ABEN TSÜNGREM DEN

Tajung ajitetang

"Anungji asenoki ano kati ka o mebendangli, saka shingaia pei adianu leman nung temetsüdaktsüba mesüra alangdaktsütsüba kodanga mayutsü mulungtetang" (Rom 14: 13)

John Wesley kenu nisung ka pai kanga dang ajumetsüa aitsü kechiaser iba nisung yagi jenjang tulu oset ka atema sempet tila ka dang agütsü, kanga dang tekoro azü-abung ka ta pai bilem. Anungji Wesley kanga dang jashia mit adok aser iba nisungi tila ka dang agütsüba atema odia dang aitsü. Wesley shibai Methodist Arogo tenzüik, anogo ishika lir külen pa diary nung pai, 'pa kanga tai' 'kecha memetetdi nisung aitsü' ta zülü. Pa diary nung yamai zülua liasü,

" .. . aitsür külen nisung kaji Wesley dangi arua, joko hopta ishika amtsük dang terara chia tzü dang jema alir, pa khristan dangi memeyipdang sentsü aika dang liasü, anungji itemji aor" ta ashi. Ano maneni iba nisung yagi ashir, "Khristai ni ochishir nisung ka kümdaktsü, anungji ni Khrista magizukdang apuba ajak sentsü aor, ni tenla tuluba tangbo magütsütetter. Khrista agizukba mulungjang nung mapa koda inyaker ibaji, tangar dang sayutsüla". Wesley-i ajak angateta arur iba nisung dang tatok meshi.

Obendang agutsütsü kanga dang lendong lir. Asenoki o mebendangi ali tajungba kechiaser asenoka obendangtsü. Kechi obendang agi bendangdir asenoka yamaji bendangtsü, kechi touzüik agi asenoki ozüktsüdir, ibajagi asenok nema ozüktsütsü (Mt.7:1-2).

ISWAP teloki Borno state nung Khristan 23 tepset aser 18 puer ao

May 23, 2025: May 15, 2025 nü Nigeria nung Borno state kübok Baga anasa alima Malam Karanti yimdak Islamic State West Africa Province (ISWAP) züngsemtemi Khristan aluyimertem aser angopur 23 tepset, ta International Christian Concern (ICC)-i metetdaksü.

Asürtemji teimbaka Gwoza nungi menjang aluyimertem liasü.

Iba dak alia ISWAP telokisa Khristan 18 puer ao, aser tang tashi parnok kong aliar memetet, ta kasa osang ajanga

metetdaksü.

Khristantemi Boko Haram telok den yariteper, ta tai tonglokja ISWAP teloki Khristantem amak. ISWAP ya Boko Haram nungi razüka aoba telok ka lir aser mapang shia parnoki Lake Chad region nung alirtem nem timtem agütsür.

2023 küm International Society for Civil Liberties and Rule of Law (Intersociety) report ajanga, 2009 küm nungi 2023 küm tashi nung Boko Haram, ISWAP aser Muslim Fulani teloktemi Nigeria nung

Khristan 52,250 shi tepsetogo, ta metetakja liasü.

Nigeria nung nisung jenti tepsetba nokdangtsü atema Northeast Nigeria tesem aika nung sepai yoka lir, ajisüaka kanga tezülen aliba tesemtem nungbo mapang shia Islamic telok balalai timtem agütsür.

Rara ajanga northeastern Nigeria nung nisung million 2 dak tali tesem balala nung prokshia lir, ta United Nations Office for Coordination of Humanitarian Affairs (OCHA)-i metetdaksü.

Precept Ministries International tentetla, Kay Arthur alima nungi pilaogo



May 23, 2025: Precept Ministries International tentetla aser nüngtugu Bible teacher, Kay Arthur May 20, 2025 nü Chattanooga, Tennessee nung lar kidang lia süadokogo; la arrshi küm 91 liasü.

Kay Arthur-i Bible studies aser kaket 100 dak tali zülüogo aser la indang Inductive Bible study method ajanga alima tesem balala nung nisung million aika kongshiogo.

Laishiba nung Tsüngrem Otem shisadangba, ratetba aser taküm nung benshiba dak

sendakba nung lai tesayuba tejangja agütsü. La ya mapang talangka TV & radio programme Precepts for Life nung shilem agia liasü. Iba sentong ya linük 30 dak tali nung sayua liasü.

Kay Arthur ya 1933 küm Jackson, Michigan nung aso. La kinüngbu Jack Arthur tenati 1970s mapang nung Precepts Ministries tenzüka mezüng lar kidang 'Bible study' agia liasü. Tangbo iba ministry ya linük 190 nung oshi 110 dak tema nung agir.

Kay Arthur-i Evangelical Christian Publishers Association aser National Religious Broadcasters na densema telok aika ket nungi award jenti nguogo. Lai Evangelical Christian Publishers Association Gold Medallion Award pezüben anguba den külemi National Religious Broadcasters Hall of Fame Award, Lifetime Achievement award, Tennessee Temple University nungi Honorary Doctorate of Humane Letters aser Piedmont International University nungi Honorary Doctorate of Divinity angu.

2020 küm la dak Parkinson tashidak putet ajisüaka lai la tasünü tashi Tsüngrem tenzüik. La kinüngbu Jack 2017 küm asü.

Lai jabaso asem, semchir 9 aser tanaben semchir 7 toktsür pilaogo.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tendak

(n) tensa mapang (era)

* Asen akhi tsürabur tendak süng lung külema liasü.

Tendak

(v) yur ataba (place something and wait)

* Tesayuri amtsük agütsüyonga arudang tanurtemi teka tendak.

OLONG PAITEP # 7160

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
							25			

TIPIEN

1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7159 TELANGZÜBA**TIPIEN :**

2. Bangsemo, 6. Tiptem,
8. Jen, 9. Talila, 11. Aren,
12. Tzübo, 14. Alia, 16. Angati,
17. Odi, 18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyoung,
13. Ajizük, 14. Aitsü, 15. Tasa,
16. Aina.

NAI-A YA METETTER MA

April 19, 2025 nü Chennai nung amenoka aliba Sishyakulam ta ser Indian classical arts education institution ajanga otsü tasen ka yangluogo. Cleveland Thyagaraja Festival nung Sishyakulam-i EPIC Choir 2025 ajanga otsü tasen ya yanglutetogo. Iba choir nung arishi küm 5 nungi 60 tashi züngsem 250 liasü asen iba ya "largest Indian music choral ensemble ever assembled" lir. Sishyakulam ajanga ayongba EPIC Choir 2025 nung U.S. state 20 tema nungi vocalists aser instrumentalists anidena liasü. Iba Choir nungsa continents asem nungi Guru 40 densema liasü aser sentong nung nisung 2,000 tema aden.

Assam sorkari süngolu nung mapa inyaker taa tutsür**Guwahati, May 23, 2025**

(Agencies): Assam sorkari International Tea Day nung kanga dang tongtipang osang ka sangoktsüogo aser ibaji tea estates nung mapa inyaker taa tutsüba lir.

October 1, 2025 nungi Assam Tea Corporation Ltd (ATCL) kübok tea gardens nung inyakteremi anogo nung Rs. 250 angutsü. Tang parnok nem Rs. 220 agütsür.

Dergaon, Golaghat district nung state cabinet senden ka amendang sorkar aser nija

meyong tea gardens tsüngda taa agütsüba nung tepila aliba atema onük benoka lemsatöp.

"ATCL tea gardens nung Cha Shramiks ajaki October 1 nungi anogoshia Rs. 250 angutsü" ta Chief Minister Himanta Biswa Sarma-i ashi.

Iba lemtet ajanga sorkari süngolu nung mapa inyakterem tajungba yaritsü tenangzükba sayur ta pai ashi.

Brahmaputra Valley nung süngolu nung mapa inyakteremi anogoshia Rs. 250 aazüka arur saka Barak Valley nung

inyaktertemibo Rs. 228 dang angur.

Iba policy tasen ya ATCL workers' wages den putepa lir aser Brahmaputra Valley nung inyakterem den kasa akümer.

"Süngolu nung inyaker kintem ya Assam maitsü nung tongtipang shilem ka lir. Parnoki küm 200 tema Assam sobaliba tajungba kümdakja arur" ta CM Sarma-i ashi.

"Assam Tea küm 200 senmang nüngtem nung Assam kübok tea garden workers nisung lakh 7 tema nem Rs. 5,000 one-time financial aid agütsütsü" ta CM Sarma-isa ashi.

"Tesüüba küm ishika tsüngda Assam nung süngolu nung mapa inyakterem atema mapa balala inyakra arur. Sorkari model schools, mobile medical units lapoktsüba den mashisa tetsürtem nem wage compensation schemes tenzüksüoggo" ta Sarma-isa metetdaksü.

Tipra Motha pusemertemi lungkak aitdang sorkar office raksatsü**Agartala, May 23, 2025**

(Agencies): West Tripura district nung government social pension schemes atema nisungtem shimba nung mepetmesü adokba sülen nisung telok kati Block Development Officer (BDO) aser Child Development Project Officer (CDPO) office tem raksatsü.

Tipra Motha Party (TMP) pusemertemi anir lungkak aitba sentong ka agidang tensa mejungi aküm.

Sorkar ketdangsürtemi pension beneficiaries shimba nung parnoki meteta alirtem dang shimok ta lungkak

aitertemi tai tongloksü.

Chichiba tangutsüpurtem yutsür ketdangsürtemi BJP aser parnok den yaritepba IPFT pusemertem dang shimok ta aitsür.

Tripura sorkar nung TMP dena lir saka par pusemertem züngdok ta ashir.

Lungkak aitertemi BDO office telungi atu aser Block Advisory Committee Chairperson o Vice Chairperson na chambers shibangtsü.

Parnokisa ki telung nung osettsüset aser CCTV cameras raksatsü aser pension recipients list tasen meshi.

Lungkak aitertemisa CDPO office-i ao aser idakji aina jaksatsü, computers aser osettsüset raksatsü.

TMP züngsemtemi party wako bener aru aser parnoki akhangba ama meinyak tashi maotsü ta ashi.

Iba tatalokba sülen police aser Tripura State Rifles (TSR) mapa lemszüksüoggo.

State sorkari tawa tu nisung 5,000 nem social pension benefits talila agütsütsü lemtetba sülen lungkak aiter. Iba scheme kübok nisung shia nem taküm piyong atema Rs 2,000 social pension agütsür.

Dibrugarh airport nem Bhupen Hazarika tenüng jaloktsütsü**Guwahati, May 23, 2025**

(Agencies): June 9, 2025 nü Assam assembly one-day special session alitsü aser iba ya Bhupen Hazarika nüngtem nung Dibrugarh airport jaloktsütsü atema lir ta Chief Minister

Himanta Biswa Sarma-i ashi.

State Cabinet-i taoba nung Hazarika küm 100 ajungba tenüng nung Dibrugarh airport nem pa tenüng jaloktsütsü telemetba agiogo.

"Governor Laxman

Acharya-i June 9, 2025 nü One Day special session alitsü jazükogo. Iba ya Dibrugarh Airport nem Bharat Ratna Dr Bhupen Hazarika tenüng jaloktsütsü atema lir" ta CM Sarma-i ashi.



Hokolbarnü President Office, Silpakorn University nung Tezpur University, Assam, aser Silpakorn University, Bangkok (Thailand) tsüngda Memorandum of Understanding (MoU) saign sütepba angur. Tezpur University tenüng nungi Vice Chancellor Prof. Shambhu Nath Singh aser Silpakorn University nung President Prof. Tanasait Ngawhirunpat nati MoU nung sign sütep. Iba tenangzüktep ajanga University ana tsüngda academic collaboration, joint research initiatives, and faculty aser student exchange programs agütsü.

GOVERNMENT OF NAGALAND

DIRECTORATE OF TECHNICAL EDUCATION

NAGALAND : KOHIMA

Dt.Kohima, the 23rd May 2025.

NOTIFICATION

NO.DTE/ESTT-2/3/2016-17/ : This is to inform the interested candidates to collect a prescribed application form for Diploma Course outside the State during 2025-26 session fromthe directorate of Technical Education, Kohima (Below New Secretariat Complex) on payment of Rs.300/- (Rupees three hundred only) with effect from 26-05-2025 to 13-06-2025 during office working hours. The form may also be downloaded from the website https://dte.nagaland.gov.inin which case the fee should be submitted in cash along with form printed in white paper (A4 size) by hand.

The last date for receiving the complete forms by hand is 16th June 2025 after which no request will be entertained. The selected list of Candidates shall be notified on or before 23rd June 2025.

Sl. No	Name of Course	Seats	Eligibility
1.	Printing Technology	1	HSLC/Equivalent Passed Certificate with Minimum 40% in Mathematics and Science
2.	Photography	1	
3.	Audiography and Sound Engineering	1	10+2 Passed (Science 45%) (40% in case of reserved category
4.	Cinematography	1	10+2 Passed (Any Stream with 45%) (40% in case of reserved category
5.	Film and Video Editing	1	10+2 Passed (Any Stream with 45%) (40% in case of reserved category
6.	Applied Acting (Film & TV)	1	10+2 Passed (Any Stream with 45%) (40% in case of reserved category

(Er. VIPULHOU LHOUNGU)
Director

GOVERNMENT OF NAGALAND

DIRECTORATE OF TECHNICAL EDUCATION

NAGALAND : KOHIMA

NO.DTE/ESTT-24/2020-21/

/Dated, Kohima the 23rd May'2025.

NOTIFICATION

Inpursuance to the clearance of the P&AR Department vide U.O No.265 dated 10-06-2024, Cabinet approval videNo.CAB-1/14/2023 dated 25-02-2025, NPSC U.O No.481 dated 27-08-2024, the concurrence of the Finance Department vide RFC/ESTT.No.78/05 dated 27-03-2025 and subsequent Government Approval No.HTE/TE/43-4/ 2024 dated 1st April 2025, applications are hereby invited from interested candidates for temporary engagement against the posts mentioned below on fixed pay for a period of 9 (nine) months or till such time the posts are filled up on regular basis through Nagaland Public Service Commission (NPSC) or whichever is earlier. The application should be enclosed along with Admit card, Mark sheet from HSLC onwards, ST/ Indigenous certificate and submit to the office of the undersigned on or before 10th of June 2025.

Sl. No.	Name of the Post with subject	No. of posts	Monthly Honorarium	Minimum Eligibility criteria
1	Lecturer in Civil Engg	1 (one)	₹ 30,000/-	B.E / B.Tech. with minimum 1 st class / 1 st division in Civil Engg.
2	Lecturer in Mechanical Engg.	1 (one)	₹ 30,000/-	B.E / B.Tech. with minimum 1 st class / 1 st division in Elect. Engg .
3	Lecturer in EEE	1 (one)	₹ 30,000/-	B.E / B.Tech. with minimum 1 st class / 1 st division in Elect. Engg .
4	Lecturer in Physics	1 (one)	₹ 30,000/-	M.Sc Physics with minimum of 60% (5% relaxed for SC/ST)
5	Demonstrator in Automobile	1 (one)	₹ 20,000/-	Diploma in Auto. Engg. with minimum 1 st class / 1 st division
6	Demonstrator in EEE	3 (three)	₹ 20,000/-	Diploma in Electrical Engg. with minimum1 st class / 1 st division
7	Demonstrator in Civil Engg.	1 (one)	₹ 20,000/-	Diploma in Civil Engg. with minimum 1 st class / 1 st division
8	Demonstrator in Welding	1 (one)	₹ 20,000/-	Class 10 with ITI / Diploma Certificate for welding.
9	Instructor in Machine shop	1 (one)	₹ 20,000/-	Diploma in Mechanical Engg. with minimum1 st class / 1 st division
10	Instructor in Electrical Shop	1 (one)	₹ 20,000/-	Diploma in Electrical Engg. with minimum 1 st class / 1 st division

2. Age as on 01.05.2025: Between 18-30 years. Upper age limit is relaxable by 5 years in case of SC/ST candidates.
3. The engagement service shall be liable to be terminated at any time without any notice and without assigning any reason thereof.
4. The appointees shall have no right to claim for regularization of the contingency-service on any ground whatsoever.

(Er. VIPULHOU LHOUNGU)
Director

UK, France aser Canada-i Hamas bhukumer: PM Netanyahu

Jerusalem, Monupii/May 23 (Agencies): United Kingdom, Canada aser France linük temi Hamas nem "second Palestinian state" yangertsü tashi agütsür aser Western lenirtem tai nung nokdaka lir, ta Israel Ato Kilonser Benjamin Netanyahu-i Hokulbarnü aitsü.

UK, Canada aser France linük tem lungjemer sangdong

ka nung Israel indang maitkari Gaza nung operation agiba aija Israeli-Palestinian rara nung two-state solution bhukumer aser Israel den külemi Palestine nunger linük temejak ka kumtetsü junger ta lemsatepba sülen Netanyahu-i iba o ya ashi.

"Tir Macron, Ato Kilonser Carney aser Ato Kilonser Starmer nunger dang ni ya

ashir: Kodang nisung jenti tepseter, tashiyim agi shi nung medemer, kinü tanur tepseter aser pua bener aortemi nenok dang pelar ta shidir, nenok justice tai nung lir. Nenok humanity tai len lir aser nenok puti otsü tai len lir," ta Netanyahu-i video ka nung ashiba X nung lemsatepa liasü.

(Maneni tapak 8 nung...)

Bangladesh mechi Muhammad Yunus alitsüla: Faiz Ahmad Taiyeb

Dhaka, Monupii/May 23 (Agencies): Bangladesh Nationalist Party (BNP) ajanga longkak aitba sülen yimsüsüba menden nungi atsüngdoker alila Sheikh Hasina'er Awami League den tokteper temia Bangladesh indang interim government advisor Muhammad Yunus agientsü khanga longkak ait, saka interim

minister kati tesunep nung yimten tashi melenoktsütsü asoshi arishi küm 84 tain Nobel Peace Prize angusang ya alitsü nüngdaker ta ashi.

Taoba küm nüburtemi sorkar anema nokdakba sülen mapa agizüksang Yunus yagi party balalai pa meyarira mapa nungi anentsü amokmerena lir.

"Bangladesh mechi aser

tesunep nung democratic transition asoshi Professor Yunus ya office nung alitsü nüngdaker," ta special assistant to Yunus aser Ministry of Posts, Telecommunications and Information Technology tekolakba Faiz Ahmad Taiyeb-i Hokulbarnü Facebook post ka nung ashi.

(Maneni tapak 8 nung...)

MULUNGNEN O



ASO : 24.03.1950

ASÜ : 17.05.2025

Asür. IMTISUNEP LEMTUR (Waromung) shiranga mozü kidang aliba mapang nungi tenzüka pa akumli wadang tembangba mapang tashi shirnokisa ozü den nübo, rongsen, shisatsü aser sarasadem agi yaritepa nungitogo, nenok ajak dang kanga pelaba lemsateper. Talisa kinünger, medemsor aser yimer-yimsanger shirnoki ozü takoksa mangyim tulu mapang tsüngdong arua mulung nena tako marok lemsatepogo ajak dang alakteta alia pelaba shisemer. Nenok mapa tajungtem asoshi ozüi meyipa agütsütsü kecha meliaka Tsüngremer talubo temoatsü agi nenok ajak meyipa moajang ta sarasademsür.

- Temeim Kinüngtsü, Chirnurtem, Semchirtem aser Kinüngertem.

Office of the

MOLUNGYIMSEN SENSO MUNG DANG

P.O. Tuli, Mokokchung : Nagaland

TENÜNGSANG AGÜTSÜR

Asür Wb. Imtikazük Sanglir aser Wt. Temjenjungla na jabaso Wb. I. Anungba Sanglir-i Food and Civil Supplies Department nung Additional Director menden atongba atema Molungyimsen Senso Mungdang-i tenüngsang tulu agütsür aser konang bentsür aruba atema pelaba lemsateper.

Tsüngremi nü taküm, kibong aser sorkar tenzüka wadang maneni len ania moajangma.

Sd/- N. Joseph Lemtur President

Sd/- B. Imsuinba Jamir Secretary

Russia-i Ukraine den ceasefire alitsü memulungra maneni merenshitsü: G7 Banff, Monupii/May 23

Ukraine nem teraksa agütsüba yanglushitsü asoshi senotsü magütsü tashi maneni nokdanga ayutsü, ta sangdong ajanga ashi.

Ajisüaka sangdong nung US Tir Donald Trump indang tariffs asoshi kecha süoka meliasü, koba ajanga alima nung shishilempaba aser supply chains nung timtem agütsür aser rongsenketzüng tsütsü tensa tejangja ka mali kumdaktsür lir.

Aser Russia-i Ukraine nung raraba asoshi US aser G7 ya tangatetba balala lir amai ajiteter.

Trump-i US tembar senzüka yutsür Moscow den ceasefire asoshi jembishinü tenzük aser rara dak sendakba nung Kremlin tangatetba den sako US ketdangsür temia amshi.

European Commission executive vice president, Valdis Dombrovskis-i ashiba agi, minister temi Russia nunger totzü barrel nung sen \$60 meshia aliba ajemer sen \$50 meshitsü indanga jembia liasü, kechiaser Russian crude ya iba dang tajemba nungi ayoker.

Ajisüaka G7 sangdong nung iba indang maden, kechiaser US-i jenjang ajemtsü memulung.

G7 senden amentsü ghonda ishika lia European Parliament nunga Russian fertiliser imports nung tariffs meshitsü lemtet.

European Union bill ajanga ashiba agi duties ya July 1 nungi mapa kuma inyaktü aser küm asem tsüngta shilem 6.5 nungi 100 shi jungnüa temloksü aser shishilempaba anentsü.

Ukraine nung raraba tembangtsü asoshi ceasefire alitsü memulungra maneni temerenshi agütsütsü ta amokmeren.

Canadian Rocky Mountains nung G7 senden atemdang Brehostibar aonung senotsü nung tekolak temi Russia-i tanen makai Ukraine nung raraba tatem kati arudaktsütsü merangba nung tamakok ajurura, Moscow atsüngzüka aotsü asoshi koma inyaktü ta teloki reprangtsü ta ashi. Iba tesem nung tan hopta ano foreign minister tem senden amentsü lir.

"Ceasefire ka alitsü memulungtepra, ano temerenshi tali agüja ajungshitsü asoshi akokba lenmang tem maneni bushitsü," ta anogo asem senden amenba sülen tatembang sangdong agüja liasü.

G7 nungya Canada, France, Germany, Italy, Japan, United Kingdom aser United States lir aser parnokisa rara nung senotsü agüja yariba linük shinga Kyiv nem tenokdangba agütsüba nungi tajangzüik mongudaktsütsüsa külemi inyaktü nangzüik.

Ajisüaka iba telok yagi China densema linük tenüng kata mezüngshi, shiri Russia nem nok-nü agütsü ta West-i taoba mapang tai tonglokja liasü.

G7 jurisdictions kübok Russia indang sovereign assets ya Moscow-i rara tembanga

Mokokchung nung Grassroots Football Day among



Eden Academy, Mokokchung nung MDFA aser Eden Academy semtepa Grassroots Football Day sentong ayongzüka akadang MDFA pur aser Eden Academy Administrator aser tanurtem külemi tangokba noksa nungji angur.

Aliba, Monupii/May 23 (TYO): Alima ajunga den külemi Mokokchung nung tanü Grassroots Football Day "Football for Goals" omen nung ajemdaker Mokokchung District Football Association(MDFA) aser Eden Academy semtepa ayongzüka iba anogomong sentong agiogo.

Tanu Eden Academy nung azünger kaketshir tanurtem den iba sentong agidang Eden Academy Administrator Wb.I.Temsü Jamir-i par school nem iba maoangka

agüja tanurtem saisapong nung anitetsü asoshi MDFA-i mapa tajung inyakba asoshi tepelaba metetdakja ashi.

MDFA Tir Wb.N.Akok Lkr-i tayongzükbä o tatsüka jembidang alima ajunga den külemi Mokokchung nunga iba sentong akaba ya Nagaland Football Association akhüm nung agir ta ashi.

MDFA Tir-isa MDFA ajanga lanurtem football asaya nung ajungkettsü asoshi mapatong balala inyakba mapang ka nung iba sentong akaba ajanga Mokokchung

nung lanurtemi saisapong nung talisa football nung talila temelung agütsütsü teimla akar aser ibaji ajanga Mokokchung nung football asaya ajungkettsü tamang akar, anungji tanurtemi iba ama football asayatsü jangraba asoshi pelar ta tanurtem ajungmesoa ashi.

Eden Academy nung tanurtemi par school meyong Futsal Turf nung telok balala lemsar asaya-a tanurtem kanga dang pelatepa iba anogomung benjung ama sentong tajung agia liasü.

Caroline Garcia-i French Open 2025 tashi asayatsü



Paris, Monupii/May 23 (Agencies): France nunger tennis asayar Caroline Garcia-i Roland Garros nung French Open 2025 sülen asaya nungi anisüngzüksü ta metetdaksüogo.

Arishi küm 31 tain Garcia ya mapang ya world number 4 jenjang tongtet aser Paris nung aliba clay court major nung 14 ben metitemi shilem agiba sülen iba asaya dang tatem salem ashitsü renema lir.

"Tematiba jenjang nung küm 15 toktepba sülen aser küm 25 dak tema kü takum nung second ajunga amai iba asaya nung bendanga agütsür ni kaket tapak melena chapter tasen tenzüksü renema lir ama bilemer," ta Garcia-i ashi.

"Ya ano metembang. Ni ano asayamung ishika asayatsü lir. Mezüngbuba kidang, Roland-Garros nung."

"Kü indang journey ya teti dangbo züpa meliasü. Tetenzük nungi tennis ya takok aser tamakok kisüng masü. Ibai temeim aser tesempa. Tepela mesüra tezü atangba. Aser ajakji liaka, iba adventure ajanga bener arutsüba asoshi temelung taroktiba nungi pelar," ta lai ashi.

"Iba asaya yagu ni tashi tait, temeim aketba aser temelungtetba tulu aliba tetsür

ka kumdaksü. Saka tang ni yutsür aotsü mapang lir. Kü temang aser ni jangraba tem ajanga ashir," ta arishi küm 31 tain-isa ashi.

Garcia, shiba world number 145 nung lir, lai Parisian tournament round mezüngbuba nung Bernarda Pera ajurutsü.

Garcia yagi la indang career nung titles 11 koka lir, aser mezüngbuba No. 4 jenjang ya September 2018 nung atong, ajisüaka iba sülen küm ishika yiruba aser mepetmesü balala agi sünga lai tetsüng yirur aliba taneptsü agitsü asoshi March 2022 nung tennis nungi anisüngzüka liasü.

Iba sülen la season indang second half nung kanga junga asayateta WTA Finals densema titles kar angu aser US Open semi-finals tonga liasü.

Malaysia Masters 2025: Kidambi Srikanth semi-finals tongogo

Kuala Lumpur, Monupii/May 23 (Agencies): India nunger badminton asayar takotet KIdambi Srikanth ya Malaysia Masters asayamung tebur kija semifinals tongogo, shibai France nunger Toma Junior Popov den Hokulbarnü kanga meranga asayar iba jenjang tongteta liasü.

Srikanth ya tang rank 65 buba nung lir saka taoba world number one aser World Championship aser Asian Games nung silver medallist lir, shibai world number 18 Popov den kanga sashia asaya liasü.

Pai ghonda ka ser minute 14 buba nung 24-22, 17-21, 22-20 agi takok ngua liasü.

Srikanth ya semi-finals nung Japan nunger Yushi Tanaka den asayatsü, koba küm ka dak tema nung last four tang mezüng asayar alitsü.

Tanaka yagi France nunger Christo Popov madak takok angu, shiba Toma Junior tenu lir. Honibarü tebur kija quarterfinal nung Tanaka-i Christo Popov madang 21-18, 16-21, 21-6 agi takok ngua liasü.

Ano iba asayamung tebur kija semi-final danga ka nung

Japan nunger fourth seed Kodai Naraoka ya China nunger second seed Li Shi Feng den asayatsü.

Hokulbarnü tarep temeyoktep quarterfinals nung Dhruv Kapila aser Tanisha Crasto na tsükba sülen BWF World Tour Super 500 asayamung nung India nunger Srikanth kisüng anünga lir.

Kapila aser Crasto nati China nunger top seeds Jiang Zhen Bang aser Wei Ya Xin den mezüng game kanga junga asaya, saka 22-24, 13-21 nung asaya tembanga liasü.

BENDANGLI OSANG : Tapak 7 nungi...

UK, France aser Canada-i Hamas...

"Tang item lenirtemi yimjung asoshi inyakba nung terenlok lir ama bilema alitsü. Yamaji masü. Hamas-i tatem maka raratsü asoshi parnoki temulung uludaksür. Aser Palestine linük tanabuba amenoktsü parnoki teimla agütsür, koba nungi Hamas-i maneni Jewish linük samatsütsü merangtsü," ta pai ashi.

Palestine nunger linük kumtetba kata nunga Hamas medeni malitsü, kechaser teti parnoki amokbanger, Iran-i yarir, anungji tesunep aliba Palestine linük yangertsüba ya asangsang masü, ta Netanyahu-i tekumdangtsü ashi.

UK, Canada aser France lenirtem külemi sangdong ka agütsüba nung Israel mitkari Gaza amakba aitsü aser Palestine nung amakba manenra sanctions agütsütsü atema asadangtsü ta tekumdangtsü shia liasü.

"Netanyahu sorkari yamai tetsübotsü mapa tamajung inyakdang onok nokdaka kisüng malitsü. Israel mitkari asendenshir amakba manenra aser humanitarian aid nung tenokdangba agüja aliba magienra, onoki telangzüba mera tesashi agitsü," ta Hombarnü agütsüba sangdong nung shia liasü.

Bangladesh mechi Muhammad Yunus alitsüla...



"Chief Adviser mapa nungi manentsü. Pai tashi arishir masü," ta paisa ashi.

Ano Yunus aser mitkartem tsünga mepetmesü adoka lir. Bodhbarnü Army Chief General Waker-Uz-Zaman-i election ya December tashinung agitsü ayongzüka lir.

"Army tem politics tetsüngtai maittsüla. Civilised linük kecha nunga army temi yamaji meinyaker. December tashinung election agitsüla ta ashiba ajanga mitkar tekolakbai pa indang jurisdictional

Ita 19 dak tema raraba sülen ano region nung Israel-i rara tesashiba kumdaksüba sülen iba sangdong ya agütsü.

Gaza nung aliba ketdangsur temia Deobar aonung nisung 103 tepsetogo ta ashi aser Israel-ia par sepaitem ya Gaza north tsütsü kiralongrar indang ki o jen anema operation agitar ta shia liasü.

Hombarnü Israel-i Gaza ajunga amokbangtsü tebilemba lir ta lemsatepa liasü.

"Kanga sashia rarar aser onoki tajangzüik angur. Onoki Strip indang territory ajunga amokbangtsü. Onoki metoktsütsü. Takok mangu tashi menokdangtettsüsa onoki inyaktsü," ta Netanyahu-i video ka Telegram nung lemsatepba nung shia liasü.

Israel cabinet-i iba military campaign tenüng 'Gideon's Chariots' jatsüba sülen iba sangdong ya agütsü.

Hamas-i arütsü alema aita October 7, 2023 nü Israel amakdang nisung 1,200 shi tepseter ano nisung 251 pua bener aoba nung telangzüba agüja Israel-i Gaza nung military campaign ya tenzük.

Iba sülen Gaza nung tang tashinung tanur 16,500 densema nisung 53,762 tepsetogo, ta Gaza nung Hamas meyong health ministry ajanga ashir.

correctness shidak mamshitet," ta Taiyeb-i tekumdangtsü ashi.

Dhaka nung party balalai toktepa longkak aitba ajaga Bangladesh yimten mepetmesü tamajungba akumer.

Bangladesh Nationalist Party (BNP) bhukumer meyrirjang aika Bodhbarnü interim government anema longkak aitba sülen Yunus mapa nungi anentsü akok ta osang kar temai adoka tensa mejungi akum.

Yunus-i June 2026 tashinung elections agitsü nangzüka lir, saka Bangladesh Nationalist Party (BNP) bhukumer temi anogo tejangja sangdongtsü akhanger.

Nisung 170 million shi aliba South Asian linük nungya kaketshir temi anir sorkar anema longkak aita August 2024 nung ato kilonser Sheikh Hasina atsüngdoka yimtenren nung mepetmesü tulu adoka liasü.

BILEMDANGANG

"Nai akoktsü ama bilemra nai maongka angutsü, nai makoktsü ama bilemra nai tetsükdaktsü angutsü."